

qui est en grande abondance dans leurs cabanes, notamment lorsqu'il fait un temps nebuleux & de neige, luy pensa perdre la veuë qu'il n'auoit des-ja gueres bonne, & fut plusieurs iours sans pouuoir ouurir les yeux qui luy faisoient une douleur extreme, tellement que dans l'apprehension que ce mal augmentast il fut contraint de les quitter après deux mois de temps & reuenir à l'habitation viure avec ses freres, car nostre Seigneur ne demandoit pas de luy la perte  
27 de sa veuë, ains qu'en le seruant il mesnageat prudemment sa santé laquelle est necessaire dans un si grand trauail.

Or quelqu'un me pourroit demander la raison pourquoy il auoit plustot choisi l'Hyuer, temps fort incommodé & fascheux pour aller avec eux, que la saison d'Esté plus gaye & supportable à la piqueure des mousquites pres: La principale raison qu'on en peut donner est à mon aduis, que les Montagnais n'ont pas de quoy viure en Esté comme ils ont en Hyuer, car l'Eslan qui est leur principale manne ne se prend que pendant les grandes neiges qui tombent en abondance dans les montagnes du Nord, où ils font leur chasse au poil, & à cause d'icelles montagnes les Sauvages qui les hantent sont appelez Montagnais.

Ie ne scay si ie me trompe, mais il me semble que ces pauvres gens viuent encore de la mesme forte de nos premiers parens après le peché. Ils n'ont ny maison ny buron & ne s'arrestent en aucun lieu qu'où ils trouuent de quoy viure, la viande faillie ils leuent le camp qu'ils posent en autre endroit où ils croyent trouuer de la beste, ou du poisson & quelques